

Varvara Boksara ando Kyustendili¹¹⁰

I Varvara Boksara si lachhi traditsiya, achhili pasha amare romende katar purane vremestar thay ame zhanasa la sar amari, romani. Kerela pes anglal ko Nevo bersh. Togava sa ekh romani familiya khidel pes pe khereste, karavel tsarevitsa thay thovel late lon ili shikeri, sarto si o familno traditsiya, a mozhinel li e duy.

Rano yavinatar ko nevo dives e romane chhave ushtena thay astarena kher zhi kheres. Vikinen dural: “Kako, bibi, avav te polazinav tumen! Te del tumen e Devel sastipe, vestipe thay bereketi!”. A chokka vakerena e tsikne chhave, a e roma mukhena len andre tatipnaste thay thovena lenge karavdi tsarevitsa. Pala e chhave lena pi tsarevitsa pe gonende thay thay kerena blagosloviya e romenge thay lengoro khereske.

Zadwlzhitelno del apes katar tsarevitsa li e grastenge, li on te oven saste, zorale thay te parvarel pe chorbadzhiyas sasto bersh. Li kaya traditsiya si but zorali pash amare romende, na mukhen pes li e grasten. A e chorbadzhiye kay isi len taliges, chustvienen kava dives sar lengoro dives, bibutyarno dives, na zhan butyrate thay praznuvinen but po-kupate akalendar.

Amare divesende I Varvara Buksara si bistardi. Samo e po-phure den pes godi sar kana ule chhave phirde kher zhi kheres thay khidinenas peske tsarevitsa katar e roma.



¹¹⁰ **Stefan Lazarov (Ali).** Byando si 1858 b. ando Kyustendili. Isi les ikaldo sredno tehlichesko shkola ande Sofiate thay kerdas buti sar sikavno ki zanimalnya, kheldyas futboli, a akana si o mahalakoro lideri. Pes zhanel sar erliya, kova ulo myusyulmanis, ama katar 1963 b. nakarig (kana e romenge kate thovena dasikane alava), leskiri familiya lela te nakhel ki pravoslavno traditsiya. Prandeme si, isi les duy chhave thay duy unukes.